

摘藻堂四庫全書薈要

子部

欽定四庫全書薈要

子部
御製律呂正義後編卷一百十七



詳校官主事臣陳木

欽定四庫全書薈要卷一萬一千五十三

子部

御製律呂正義後編卷一百十七

樂問一


律由數起

十二律數

律數五音

含少

黃鐘圖徑



三分損益

樂問

聲音之道本乎氣生乎心憑乎器其理至精而難知其數至微而難辨況古今制作代有不同雖博考詳說猶恐未易盡其義蘊傳曰問以辨之蓋非問弗辨非辨弗明也爰作樂問以終編焉

律由數起

問漢志言度量衡皆起於律又曰推歷生律律呂新書則曰分寸之數具於聲氣之元不可得而見及截竹為管吹之而聲和候之而氣應而後數始形焉然則數由律起乎抑律由數起乎曰律由數起也漢志曰推歷生律制器規圓矩方權重衡平準繩嘉量探蹟索隱鈎深致遠莫不用焉度長短者不失毫釐量多少者不失圭撮權輕重者不失黍絫紀於一協於

十長於百大於千行於萬其法在算術觀志所言是律生於數而度量衡又起於律也後漢志曰物生而後有象象而後有滋滋而後有數天地初形人物既著則算數之事生記稱大撓作甲子隸首作算數二者既立以比日表以管萬事一十百千萬所同用也律度量衡歷其同用也是又言律與度量衡同起於數也蔡元定曰律未成之前有數而未見律成而後數形焉度之成在律後度之數在律前故律之長短

圍徑以度之分寸之數而定是又言律起於數度成於律而律又定於度也凡此皆律由數起之義也曰律起於數固已然律貴中聲漢志稱黃帝使伶倫吹竹為黃鐘之宮制十二管以比鳳凰之鳴程子曰黃鐘之聲亦不難定世自有知音者將上下聲考之蔡元定曰欲求聲氣之中莫若多截竹管即以其長權為九寸而度其圍徑如黃鐘之法更迭吹之此皆求律於聲也今謂律由數起則求諸聲者非耶曰聲與

數俱大則聲洪小則聲細長則聲濁短則聲清自然之理也聖人制律以筦中聲後世律失而中聲失乃求律以正聲而律不可考宋儒之意蓋謂從聲轉可得律非言律不從數起也以人聲言之惟人百骸九竅寸分毫釐與天地橐籥相符契故能清能濁能高能下物不能然而其取數多者則音有回邪曲直抑揚進反其取數少者則戛然一聲而已由是言之聲本起於數故律亦起於數也律呂新書曰黃鐘陽聲

之始陽氣之動也故其數九長九寸空圍九分積八百一十分是為律本朱子曰本原第一章圍徑之數是最大節目蓋聲氣之元適合乎天地自然之數所謂即以其長權為九寸而度其圍徑如黃鐘之法者也曰律之圍徑定於度而度之大小惟人所命安見聲氣之元適合乎自然之數耶曰此非人之所能為也黃鐘之數九夫九者數也所以九者理也苟取黃鐘之長九寸而三分之以為寸則長為三寸空圍為

一分算術邊以一當三積其實當為三十分矣如取

九十分黃鐘之長而以二分為一分則長為四寸五

分空圍為二分二十五釐邊以一當二則面積以一當四積其實當

為一百分一百二十五釐矣邊以一當二則面積以一當八又如取

九分黃鐘之長而以一分為二分則長為一尺八寸

空圍為三十六分邊為二倍則面積為四倍積其實當為六千四

百八十分矣邊為二倍則面積為八倍小之大之皆與九數不合

惟如其九十分以為度則縱長空圍積實之數皆得

九易傳曰參天兩地而倚數參天為三三三為九故
乾為九黃鐘乾之初九也朱子曰河圖奇偶位均而
主全故數極於十洛書以陽統陰而主變故數極於
九黃鐘生十一律主陽統陰者也故黃鐘長九寸析
之而為九十分九而十之之數也周髀經曰圓出於
方方出於矩矩出於九九八十一黃鐘之管空圍九
分圓面之方分也方一而圓四每邊皆一分周徑之法所由起也
積八百一十分九九而十之之數也長圓體之立方

分也

立方體六面每面皆一分

權量之法所由起也縱長空圍積

實之數皆得九而聲適得黃鐘之宮所謂聲氣之元
適合乎自然之數也數因理立理以數形上編黃鐘
理數篇曰有黃鐘之聲必有黃鐘之數有黃鐘之數
必有黃鐘之理若無以明其理即無以精其數無以
精其數即無以得其聲聖人心通造化默會中聲製
為黃鐘適符天地自然之數大哉言也斯其至矣

十二律數

問律由數起既聞命矣史記律數生鐘分乃律數之
最古者今皆不用何也曰史記律數乃取黃鐘之律
九寸寸作九分凡八十一分而又以十約之為寸故
曰八寸十分一與今寸分之數不合故不用且其所
記寸分之法與他記不同以難曉故多誤律呂新書
嘗辨而正之矣至生鐘分所記子一分丑三分二寅
九分卯八分二十七分十六辰八十一分六十四巳二

百四十三分一百二十八午七百二十九分五百一十二未二千一百八十七分一千二十四申六千五百六十一分四千九十六酉一萬九千六百八十三分八千一百九十二戌五萬九千四十九分三萬二千七百六十八亥十七萬七千一百四十七分六萬五千五百三十六則以三分損益之法定十二律呂之率取其各得整分而無奇零分字以上者為分母分字以下者為分子分母皆黃鐘之全數分子為諸

律所取於黃鐘長短之數若以比例法求諸律之長則各以分母為一率各以分子為二率黃鐘之長為三率二率與三率相乘以一率除之則得四率為各律之長即上編所載是也如子一分即黃鐘九寸丑三分二以分子二與黃鐘九寸相乘以分母三除之得六寸即林鐘之長寅九分八以分子八與黃鐘九寸相乘以分母九除之得八寸即太簇之長卯二十七分十六以分子十六與黃鐘九寸相乘以分母二

十七除之得五寸三分三釐三毫三絲三忽三微三纖即南呂之長餘皆倣此問者曰依此推算則自南呂而降皆有奇零推至微纖終不能盡則何如用古人之定率各得整分而無奇零為尤愈乎曰凡人目力所及至毫而止毫以下雖有數而實無用矣用之至毫而推之至纖其數已密如第舉其定率曰某律為黃鐘幾分之幾則非惟毫以下之數不及辨即寸分之數亦非算不知其不適於用莫大乎是故實指

其分寸釐毫之數正所以善用古人而非不用古人也安得謂彼善於此乎曰上編但言三分損益而不言生鐘分比例之法又何也曰生鐘分即三分損益之所推也古人欲舉十二律之全數故累加之為整分而分母各不相同以求其數則須用比例之法今欲實指其寸分釐毫之數則雖求至微纖不過三分損益一乘一除之法耳舍三分損益一乘一除之法而不用而用生鐘分逐律比例以相求拙矣然仕舉

一律舍生鐘分一比例之法而不用而用三分損益
累求而後得之抑又拙矣故上編雖不言比例而比
例之法固不可廢也曰律呂新書黃鐘生十一律及
十二律之實二篇其數互異且十二律之實篇所載
十二律寸分之度又與上編十二律古尺之度不同
何也曰黃鐘生十一律即史記之生鐘分各律之分
母不同如三分九分故寸分釐毫之法亦不同如一為三寸一
為一寸其十二律之實則又即黃鐘之實十七萬七
之類

千一百四十七而三分損益之以為十一律之實其

分母同

皆十七萬七千一百四十七

故寸分釐毫之法亦同

如一萬九

千六百八十三為寸法之類

而其實則一也

丑三分二與林鐘十一萬八千九十八皆

得六寸也其與上編十二律古尺之度又不同者今之分

寸以十為法律呂新書以九為法也曰以九為法可

乎曰九分為寸之法史記漢志皆無明文索隱謂漢

志黃鐘九寸乃九分之寸蓋取黃鐘九寸合之宮數

九九八十一而為此說耳蔡氏用其說以九為法則

黃鐘林鐘太簇得整寸南呂姑洗得整分應鐘蕤賓
得整釐大呂夷則得整毫夾鐘無射得整絲仲呂得
整忽皆無奇零今以黃鐘九寸寸作九分釐毫絲忽
皆以九遞析亦無所不可究之九分之寸實無所用
且以長為八十一分與空圍九分相乘則與積八百
一十分之數不合上編定律呂之長損益相生篇云
九十分乃黃鐘之正數八十一分原於管子絃音五
聲度分史記淮南子遂以為管音度分新書雖兼取

之而九寸之說實不可易此定論也曰律呂新書為
史記所記分寸之法難曉多誤而以二千一百八十
七為全分七百二十九為三分一一千四百五十八
為三分二餘分多者為強少者為弱逐律改正其數
果信然乎曰此可算而知也蓋自應鍾以下皆有奇
零以三分之不盡故置一而七三之得二千一百八

十七為一分之全數

十一三之為實而黃鍾為九寸故九三之為寸法九三之者十

一三之九分之一也寸為九分故七三之為分法
七三之者九三之九分之一即十一三之之八十

一分之一也此章雖以十分為寸而黃鐘之長乃以八寸一分故仍以全實八十一分之一為分法

除應鐘之實九萬三千三百一十二得四寸二分餘一千四百五十八恰得三分之二為應鐘之長以二千一百八十七除蕤賓之實十二萬四千四百一十六得五十六分餘一千九百四十四減一千四百五十八為三分二強四百八十六為蕤賓之長倣此類推其數悉合惟無射長四寸四分三分二強六百一十八今本作強六百零二乃傳寫之誤耳曰蔡氏所

改正誠是矣然以餘分定強弱以校多寡則甚明而與史記本文則不相類上編律呂之數推至微纖固已密矣然纖以下猶有奇零今欲皆以分數約之可乎曰古之人有約之者後漢志小分以下別強弱所以開蔡氏之先周禮註強以下用約分所以承史記之後然律以九十分為法與史記數不合而數止於分不如今數推至微纖之密今依史記本文以八十分分為法分以下用約分而今定律數則毫以下用

約分列表如左

改正史記律數

黃鐘 八寸十分一

林鐘 五寸十分四

太簇 七寸十分二

南呂 四寸十分八

姑洗 六寸十分四

應鐘 四寸二分三分二

蕤賓 五寸六分九分八

大呂 七寸五分二十七分二十三

夷則 五寸八十一分四十六

夾鐘 六寸七分二百四十三分一百零三

無射 四寸四分七百二十九分六百九十二

仲呂 五寸九分二千一百八十七分二千三十九

今定十二律古尺之度

黃鐘 九寸

林鐘 六寸

太簇 八寸

南呂 五寸三分三釐三毫三分毫之一

姑洗 七寸一分一釐一毫九分毫之一

應鐘 四寸七分四釐二十七分毫之二十

蕤賓 六寸三分二釐八十一分毫之八十

大呂 八寸四分二釐七毫二百四十三分毫之二

百三十九

夷則 五寸六分一釐八毫七百二十九分毫之四

百七十八

夾鐘 七寸四分九釐一毫二千一百八十七分毫
之一千一百八十三

無射 四寸九分九釐四毫六千五百六十一分毫
之二千三百六十六

仲呂 六寸六分五釐九毫一萬九千六百八十三
分毫之二千九百零三

今定十二律今尺之度

黃鐘 七寸二分九釐

林鐘 四寸八分六釐

太簇 六寸四分八釐

南呂 四寸三分二釐

姑洗 五寸七分六釐

應鐘 三寸八分四釐

蕤賓 五寸一分二釐

大呂 六寸八分二釐六毫三分毫之二

夷則 四寸五分五釐一毫九分毫之一

夾鐘 六寸零六釐二十七分毫之四

無射 四寸零四釐五毫八十一分毫之三十五

仲呂 五寸三分九釐三毫二百四十三分毫之二
百二十一

問者曰古今律數不同若有術以通之乎曰有術
設仲呂古尺六寸六分五釐九毫一萬九千六百八

十三分毫之二千九百零三求仲呂今尺之度則以
古尺十寸為一率今尺八寸一分為二率置仲呂古
尺六寸六分五釐九毫以分母一萬九千六百八十
三通之加分子二千九百零三得一億三千一百零
七萬二千為古尺之總分為三率求得四率一億零
六百一十六萬八千三百二十為今尺之總分以一
萬九千六百八十三為法除之得五寸三分九釐三
毫餘實一萬七千九百零一與法對減餘八十一以

之除法得二百四十三為分母除實得二百二十一
為分子即仲呂今尺之度也如以仲呂今尺之度轉
求新書古尺九分寸之度則置黃鐘今尺七寸二分
九釐以二百四十三分通之得一百七十七萬一千
四百七十為一率置仲呂今尺五寸三分九釐三毫
以二百四十三通之加小餘二百二十一得一百三
十一萬七百二十為二率黃鐘之實十七萬七千一
百四十七為三率求得四率十三萬一千零七十二

為仲呂之實以寸法一萬九千六百八十三除之得
六寸餘一萬二千九百七十四又以分法二千一百
八十七除之得五分餘二千零三十九又以釐法二
百四十三除之得八釐餘九十五又以毫法二十七
除之得三毫餘十四又以絲法三除之得四絲餘二
算為六忽一為三忽即仲呂古尺九分寸之度也餘倣此
推寸寸分釐毫之法及九分寸之度具載律呂新書

律數五音

問史記律數以宮隸黃鐘以商隸太簇而又以羽隸姑洗以角隸林鐘以徵隸南呂其記難通且仲呂下有徵夷則下有商應鐘下有羽字更不可解何也曰此皆誤也律數既曰九九八十一以為宮三分去一五十四以為徵三分益一七十二以為商三分去一四十八以為羽三分益一六十四以為角矣又於黃鐘下有宮字太簇下有商字姑洗下有羽字林鐘下

有角字南呂下有徵字無論十二律還相為宮不可律以五音相生之法即以五音相生法按之是宮不生徵而生角角不轉生變宮而生商商不生羽而生徵徵不生商而生羽羽不生角而生宮是自相背戾也晉志所謂律書五音相生而以宮生角角生商商生徵徵生羽羽生宮求其理用罔見通達者是也至仲呂下有徵夷則下有商應鐘下有羽與前文又不一例律呂新書所謂後人誤增者是也曰然則此誠

誤矣至其生黃鐘術有上九商八羽七角六宮五徵
九云者司馬貞索隱謂此五音之數宮去一下生徵
徵益一上生商商去一下生羽羽益一上生角然此
文似數錯未暇研覈蔡季通律呂新書謂此即上文
聲律數太簇八寸為商姑洗七寸為羽林鐘六寸為
角南呂五寸為徵黃鐘九寸為宮其曰宮五徵九為
誤字自此以後言樂諸家皆不得其說是又何也曰
此蓋據酉為寸法而言也明李文察有曰上九者以

九為尚之謂也以下八七六五九之數皆至酉而定
蓋酉為寸法也商居寅至酉而當八羽居酉衝在卯
至酉當七角居辰至酉當六宮居子至酉當十十者
二其五也徵居未衝在丑至酉當九此上九商八羽
七角六宮五徵九之說也蓋不論其長短惟尚九則
凡商皆八凡羽皆七凡角皆六凡宮皆五凡徵皆九
是故黃鐘者九寸之九寸也諸管者諸管之九寸也
諸管皆尚九故諸管皆可為宮至於起調則五音隔

八相生起乎羽終乎宮皆與此數適相合焉是數也
其樂之關鍵乎又曰置一而九三之者正言上九之
理也寘一者寘子上一位也九者自丑至酉有九位
也三之以為法者丑上為一三至酉為九三也得長
一寸者酉上為寸法也得九寸者寅上為寸數也命
曰黃鐘之宮見生黃鐘之術不越乎此矣又曰一者
神也九者太陽之數也其為得長一寸得九寸者蓋
一其體也九其數也體數之間神之所以妙萬物也

一九之間黃鐘之所以妙五音也文察之言如此今本其說推之其曰上九者謂以九為上而主之即尺取九寸寸取九分以九合乎黃鐘之數而上子也自商居寅至酉當八至徵居未沖在丑至酉當九所謂商八羽七角六宮五徵九也陽律當位自得陰呂則居其衝此自黃鐘一調言之也十二律遞推則酉亦遞轉十二位而為十二調之寸法焉又還相為宮之法也其下文曰寅一而九三之以為法實如法得長

一寸凡得九寸蓋證此十二言之為據酉寸法為無
疑也蓋氣始動於子為一所謂寘一也參之於丑得
三所謂寘一而三之也又自丑歷寅卯辰巳午未申
至酉凡九位皆以三遞乘之得一萬九千六百八十
三所謂寘一而九三之也所謂以為法者為寸法也
所謂實如法得長一寸凡得九寸者謂實數與法等
則得長一寸黃鐘之實十七萬七千一百四十七為
寸法之九倍則得寸者凡九也不可証此十二言之

為據西寸法而言耶蓋遷史之詞奧旨約如此至於律數中所繫商角徵羽等字則所謂謬誤之說固不能強為真一解也

含少

問黃鐘長九寸自漢淮南子天文訓司馬遷律書班固律歷志相傳舊矣近世乃有以三寸九分為黃鐘者是耶非耶曰黃鐘以九寸為度老陽之數也長九寸圍九分積八百一十分損益相生十一律無不根柢於此若三寸九分之數乃含少非黃鐘也曰敢問含少之名何自昉而其義又何居曰呂氏春秋云黃帝令伶倫自大夏之西阮隃之陰取竹於嶰谿之谷

以生空竅厚均者斷兩節間長三寸九分而吹之以為黃鐘之宮曰含少晉書律歷志亦載焉含少之名見於此至其為義明黃佐樂典謂黃鐘正度八十一變黃鐘之半正度三十九其數不合謂為黃鐘少聲則近是其說以三十九為子半數陽猶麗陰陰含少陽是以名也此含少之義也問者曰其以此為黃鐘何也曰為此說者始於呂氏春秋而長孫無忌之隋志劉恕之外紀述之至明李文利則樹其一家之說

曰黃鐘長三寸九分空圍九分為聲氣之元其時子
半其數極少其聲極清音屬正宮一陽方動其卦為
復黃鐘之尊在於氣清上行清以生濁靜以生動清
者數少濁者數多數少者貴數多者賤陽升起子半
極午半由黃鐘而漸益陽降起午半極子半由蕤賓
而漸損黃鐘居蕤賓之管九寸極黃鐘之變此文利
之大旨也黃積慶王邦直李廷機之說與文利同曰
然則從九寸而不從三寸九分者何也曰此其義有

四端初九律之首初六呂之首參天兩地之義也於
三寸九分何取焉一也河圖天數九黃鐘九寸是得
河圖之天數也洛書之數四十五倍之為九十黃鐘
九寸是得洛書之倍數也於三寸九分又何取焉二
也黃鐘之宮屬土土在五行重濁而下凝若以三寸
九分為之是土反輕清而上浮也可乎三也九以純
陽為元聲管長聲濁故為十一律之本若三寸九分
之管則極短極清其能蘊有衆音乎且以長役短以

濁役清者力常有餘以短役長以清役濁者力常不足其能反而用之乎四也問者曰竊聞言理者驗諸數言數者徵諸事彼黃鐘者度量權衡所自出也盍以九寸及三寸九分比而証之果孰合耶曰此固証之而歷歷不可易者也黃鐘制器規圓矩方權重衡平準繩嘉量度九寸之長以審度而五度定實九寸之積以嘉量而五量平較九寸所容之重以謹權衡而五權正若以三寸九分易之則分之無一黍之廣

而不足於分十分不寸十寸不尺十尺不丈十丈不
引而度不成矣龠無千二百黍之積由是躍之非合
登之非升聚之非斗角之非斛而量不成矣積無十
二銖之重則兩之不足以成兩十六之不足以成斤
三十之不足以成鈞四之不足以成石而權衡不成
矣出納鮮平農桑失業皆自此始其可乎曰然則其
聲為黃鐘之宮者何也曰上編嘗言之矣黃鐘之半
律不與黃鐘應而應黃鐘者為太簇之半律今以製

音之法推之半太簇長四寸其掣音之分比黃鐘微
低再短一分則恰與黃鐘合故三寸九分之管其聲
適中黃鐘之宮此乃聲音應合自然之理而非謂三
寸九分即為黃鐘也問者曰黃鐘固宜用九寸矣獨
疑黃鐘極長應鐘極短二律之交長短隔絕音調不
屬耳曰音止於七至第八音則復與首音同不患其
不相屬也十二律還相為宮舊則陰陽二均同用而
有黃鐘大呂太簇夾鐘四清聲今則陰陽二均分用

而有夷則南呂無射應鐘四倍律轉移適均調劑中
節又何疑其不相屬哉曰呂氏去古未遠記禮者猶
取之為經今如所言則呂氏之言妄乎曰非妄也三
寸九分以之為含少則是以之為黃鐘則非耳且呂
氏仲夏紀既云以三寸九分為黃鐘之宮矣及季夏
紀又曰黃鐘生林鐘林鐘生太簇太簇生南呂南呂
生姑洗姑洗生應鐘應鐘生蕤賓蕤賓生大呂大呂
生夷則夷則生夾鐘夾鐘生無射無射生仲呂三分

所生益之一分以上生三分所生去其一分以下生黃鐘大呂太簇夾鐘姑洗仲呂蕤賓為上林鐘夷則南呂無射應鐘為下其法固與史記漢書上下相生三分損益之法同而黃鐘之宮仍實起於九寸也是呂氏之說固亦未嘗以是為黃鐘也漢書用呂氏說而猶削去長三寸九分一語蓋亦有所不取矣問者曰呂氏之說如此先儒亦曾有駁之者乎曰蔡季通嘗言之矣其言曰或疑呂氏春秋所載黃鐘之管三

寸九分信乎曰吾嘗思之九寸之可信者稽數而一陽立泝理而一元存律氣而中聲出有可據也若夫三寸九分陽不成陽陰不成陰次第損之則纖伏而無聲次第益之則高亢而不倫實無一之可據也蔡氏疑之如此明王廷相韓邦奇俱以為非是而排之云問者又曰明鄭世子朱載堉以天地之全數為一百二十減八寸一分餘三寸九分故曰含少其說非耶曰此載堉湊合之說也一百二十既非天地全數

而八寸一分乃九分之寸三寸九分乃十分之寸又不可以強合如皆以十分之寸計之則黃鐘九寸與含少三寸九分共為一百二十九其又將以為何數也耶

黃鐘圍徑

問黃鐘長九寸既聞命矣惟周徑之數上編所定與古皆不同何也曰律之周徑古無明文班固漢志曰黃鐘之實八百一十分絲此之義起十二律之周徑鄭康成月令注曰凡律空圍九分蔡邕銅龠銘曰黃鐘之管長九寸空圍九分蓋長九寸積八百一十分則空圍必九分而周徑可以數起也自孟康注漢書韋昭注國語始曰徑三分圍九分至隋志乃著為定

論蔡元定所謂隋氏之失皆康昭啟之是也宋胡瑗獨具卓識謂空圍九分為圍中容九方分以破徑三圍九之誤蔡元定因之然其所謂徑三分四釐六毫圍十分三釐八毫者猶是徑一圍三之法其數不密聖祖仁皇帝考定黃鐘律管徑三分三釐八毫五絲一忽圍十分六釐三毫四絲六忽蓋本漢儒空圍九分之說用密率推算獨得其真此我朝制作所以直符乎聲氣之元而為歷世所未有也曰上編所定誠有本

矣但注疏音空為孔則鄭氏所謂凡律空圍九分者似謂凡律之孔皆圍圓九分而孟韋之說誠是也安在其為誤耶曰注疏音義或附會孟韋云然未必即鄭之本義也注疏固有讀空為孔者然鄭注樂器皆曰孔此獨曰空則知空圍云者言律管虛圓內容九分猶斛銘之云幕者也斛體實故曰幕管體虛故曰空圍皆算術所謂面積者也且孟康漢志注林鐘長六寸圍六分以圍乘長得積三百六十分太簇長八

寸圍八分為積六百四十分雖其數非是而其所謂
圍者固指面積言也故宋儒皆空圍二字連讀胡瑗
謂圍中容九方分蔡元定謂空圍中廣九分朱子曰
古人只說空圍九分不說徑三分蓋不啻三分猶有
奇也如謂空之圍為九分則徑且不足三分而面積
僅六分四十六釐有奇體積僅五百八十二分有奇
黃鐘之實又安得有八百一十分哉曰空圍之義誠
然矣顧漢志所云八百一十分者乃置終天之數八

十一以五位之合終於十者乘之非置空圍九分以長九寸乘而得之也安見空圍九分之說之遂可以為據耶曰律呂新書有言漢志以律之長自乘而因之以十亦配合為說耳未可以為據也惟審度章云一黍之廣度之九十分黃鐘之長一為一分嘉量章云千二百黍實其龠則是累九十黍以為長積千二百黍以為廣可見也夫長九十黍容一千二百黍則空圍當有九方分也漢斛銘文曰律嘉量斛方尺而

圓其外廂旁九釐五毫累百六十二寸深尺積千六

百二十寸容十斗嘉量之法合龠為合十合為升十

升為斗十斗為斛斛積一千六百二十寸為一百六

十二萬分

體積千分為寸千寸為尺

斗積十六萬二千分升積一

萬六千二百分合積一千六百二十分則黃鐘之龠



為八百一十分明矣新書此言實貫度量之法黃鐘

之龠八百一十分則面積必九分矣此以漢志及斛

銘考之而知空圍九分之說為可據也曰然則孟康

韋昭以空圍九分為徑三分圍九分誠誤矣然誤必有因敢問因何而誤耶曰胡瑗律議有言度量權衡皆出於黃鐘之龠則空圍容受可交相酬驗使不失其實今驗黃鐘律管長一分容十三黍三分黍之一圍中容九方分也後世儒者不能貫知權量之法因謂圍九分者取空圍圓長九分耳以是圍九分之誤遂有徑三分之說若依徑三圍九之法則黃鐘之管止容九百黍與權量之法皆不合由是言之則是因

空圍之圍誤為圍圓之圍又因圍九徑三誤為徑三圍九也曰圍九徑三與徑三圍九亦有異乎曰謂圍九分為圓長九分者特以圍九分為九圓分耳其徑猶實是三分也若謂徑為三分則其圍已不止九分矣何者以徑一分作九圓各長一分其積為長圓九分以徑三分作一圓長一分其積亦為長圓九分試作圖



以一分為徑作九小圓以三分為徑作一大圓各方
其外小圓比小方猶大圓比大方一小圓比一小方
猶九小圓比九小方九小方之積與一大方等則九
小圓之積亦與一大圓等是因圍九分之誤而為徑
三分之說者猶謂徑三分積九圓分也若以徑三分

圓九分算則體積容受所差益遠以數計之圓長九分其為立方分者七分零六十八釐五百八十三毫有奇黃鐘之實得六百三十六分一百七十二釐有奇若徑三分圓九分長一分則為立方分者僅六分七百五十釐黃鐘之實僅得六百零七分五百釐圓分固算法之所無而徑三圓九其差尤甚蔡元定所謂累黍容受不能相通也此皆算術不精之過也曰徑三圓九之法固疏矣鄭康成以善算聞乃止言空

圓而不言周徑何也曰此其所以善算也言周徑則
奇零無盡言空圍則約而能該猶律分之以三為率
也曰祖沖之古稱密率彭魯齋用推黃鐘律管徑三
分三釐八毫四秒四忽萬分忽之五千六百四十五
周十分六釐三毫六秒八忽萬分忽之六千三百一
十二上編謂猶未密何也曰隋志載祖沖之更開密
法以圓徑一億為一丈圓周盈數三丈一尺四寸一
分五釐九毫二秒七忽胸數三丈一尺四寸一分五

釐九毫二秒六忽正數在盈朒之間密率圓徑一百

一十三圓周三百五十五約率圓徑七圓周二十二

故方積二十八圓積二十二

約之則為方積十四圓積十一

彭魯齋

用約率故曰猶未密也曰約率之所以未密可數計

乎曰以今之定率言之圓徑為一億則圓周為三億

一千四百一十五萬九千二百六十五小餘三五八

九七九三一三八四方積為一億則圓積為七千八

百五十三萬九千八百一十六小餘三三九七四四

八三零九六

法見數理精蘊

故徑為七萬則圓周當為二十

一萬九千九百一十一今其率為二十二則多二十

二萬分之八十九是周率大矣方積為二十八萬則

圓積當為二十一萬九千九百一十一今其率為二

十二則多二十二萬分之八十九是圓積大圓積大

則方積小矣故以積求徑則失之少以徑求周則失

之多此數之顯然可考者也曰然則其密率果密乎

曰以今之定率推之圓徑為一百一十三萬則圓周

為三百五十四萬九千九百九十九進為三百五十
五僅差三百五十五萬分之一校之徑七圍二十二
相去不啻什伯矣曰上編所用方積圓積之定率抑
又不同且推黃鐘周徑至忽而止其率之疏密與忽
以下之奇零可得聞乎曰方圓比例雖推至十數位
終有奇零惟其足用耳以今之定率推之圓積為十
萬則方積為一十二萬七千三百二十三小餘九五
四四六二進為二十四僅多千萬分之五且製黃鐘

管徑用數不過至毫推之至忽其數已密如自忽以下細推之則黃鐘之徑為三分三釐八毫五絲一忽萬分忽之三千七百五十周為十分六釐三毫四絲七忽萬分忽之二千三百一十雖有數可推而實無形可見且又非以此為起數之原故推之至忽而止也曰十二律之周徑皆同乎曰同也鄭康成月令注曰凡律空圍九分孔穎達疏曰諸律雖長短有差其圍皆以九分為限蔡邕月令章句曰黃鐘之管長九

寸其餘皆稍短惟大小圍數無增減是也孟康漢志注乃曰林鐘圍六分太簇圍八分以就班志三百六十分六百四十分之說不知班志所謂三律之實乃以九九六六八八配合為說而非以長乘圍而得之也胡瑗未知半律之不應正聲故於四清聲皆小其圍徑而夷則以下四律又皆以次小其圍徑以就之蔡元定惜其反不如和峴舊樂為條理蓋惟圍徑之同故由長短之異以定聲之高下此同徑之說上編

所以為定論也曰十二律圍徑之數誠至今日而定
矣惟是蔡邕之說今多採取而其月令章句亦曰黃
鐘之管徑三分何也曰此與龠銘互異律呂新書以
為不可曉或擇焉弗精或傳之有誤皆不可考今其
全書又不傳置之弗論可也

三分損益

問律呂上下相生必以三分損益何也曰九以三為根律呂相生始於黃鐘九寸故其分之也必以三為法其數始行而其聲始和也曰其或損或益何也曰陽常有餘必損之而後可以生陰陰常不足必益之而後可以生陽此陰陽自然之理殽於象數而徵於律呂莫之為而為焉者也曰陽律皆主下生陰律皆主上生漢志相生之法固然乃蕤賓夷則無射之律

法宜下生然三分損益僅得其所生之呂之半必倍之而後其數合何也曰陰陽之道不可為典要其以六律為陽六呂為陰者因其所中之月而以奇者為陽偶者為陰也實則自子至巳六辰為陽自午至亥六辰為陰此則生於陰陽之大分而不以奇偶為泥者也如易之橫圖然其生於陽儀者有奇有偶其生於陰儀者亦有奇有偶凡奇皆陽凡偶皆陰此以奇偶為陰陽者也實則凡生於陽儀者無論奇偶皆陽

之屬凡生於陰儀者無論奇偶皆陰之屬此又陰陽之大分不泥於奇偶者也以此推之則黃鐘太簇姑洗三律於月則奇而又屬乎陽辰之分故為陽之陽若蕤賓夷則無射三律於月雖為奇而已屬乎陰辰之分故為陽之陰林鐘南呂應鐘三呂於月則偶而又屬乎陰辰之分故為陰之陰若大呂夾鐘仲呂三呂於月雖為偶而乃屬乎陽辰之分故為陰之陽以陽之陽者而下生陰之陰者而上生自於陽損陰益

之本法合若陽之陰陰之陽者則其法不能以無異
故自呂覽淮南以及通志其相生之法皆以蕤賓夷
則無射三律為上生大呂夾鐘仲呂三呂為下生者
以此也曰然則馬班之說主於奇偶以定陰陽呂覽
淮南通志之說主於大分以判陰陽亦既各有所見
矣將孰優耶曰天有闢闔之二運而後有十二辰之
方歲有舒肅之二氣而後有十二月之位則大分之
陰陽所以括乎奇偶之陰陽者也故律呂相生朱子

亦主呂覽淮南通志之說者以此也曰如馬班之說則損一而下生者六益一而上生者亦六其數適均如呂覽淮南通志之說則損一而下生者五益一而上生者七其數不均今不從其均者而反從其不均者何歟曰此陽饒陰乏之秘樂理於是為至也今夫一日之間晷行地上者一百八十度於分為晝屬陽行地下者亦一百八十度於分為夜屬陰此其均焉者也然日未出地平十有八度而色已可辨日入地

平十有八度而色始不辨是晝之度數凡二百一十有六夜之度數僅百四十有四故曰乾之策二百一十有六坤之策百四十有四此陽饒陰乏驗諸矇景而最明者也且夫午雖陰辰而適奠正南之方故後天圖以離位之而退坤於西南明姤陰雖始生於午而午實為陽明用事之會必至西南之未方而後純屬於陰也蕤賓以陰辰之律而從乎陽其義亦猶是也由斯以談則子丑寅卯辰巳以及於午之律皆以


上生而屬陽是陽居其七也惟未申酉戌亥之律皆為下生而屬陰是陰僅居其五也羸絀之分明而扶抑之理得矣曰然則此三分損益固聖人設此一定之成法以為樂律之範圍耶曰此乃律成而自合乎三分損益之數非以意為損益而預設三分之法也漢志謂制十二筩聽鳳之鳴比黃鐘之宮而皆可以生之是為律為是十二筩協乎鳳鳴者音之諧也其音既諧於是旋轉不窮皆可以生之而法以立焉不

云先為損益之法以制十二簫也後世傳此三分損益則雖黃帝時之十二簫今猶可以考焉則作者聖述者明所以相得益彰也如謂設此一定之成法以為樂律則左矣宋李如篴樂書曰古之聖人制十二管以候十二辰之氣而十二辰之音亦由之而出以十二管較之則黃鐘之管最長應鐘之管至短以林鐘比於黃鐘則短其三分之一以太簇比之林鐘則長其三分之一其餘或長或短皆上下於三分之一

之數其默符於聲氣自然之應者如此當時惡睹所
為三分損益哉誠哉是言也



御製律呂正義後編卷一百十七



總校官庶吉士臣張能照
校對官中書臣馮培
謄錄監生臣丁湘錦

欽定四庫全書薈要

子部

御製律呂正義後編卷一百十八



詳校官主事臣陳木

欽定四庫全書薈要卷一萬一千五十四

子部

御製律呂正義後編卷一百十八

樂問二

朱載堉新說

律數往而不返

律數合於易

中聲

四倍律



七律

變律

朱載堉新說

問黃鐘長九寸空圍九分三分損益生十一律既聞
命矣明鄭世子載堉律呂精義不宗黃鐘九寸不用
三分損益不拘隔八相生不取圍徑皆同何也曰此
載堉之臆說也曰載堉固自謂鑿鑿有據矣今以為
臆說可得而詳辨之乎曰黃鐘之為九寸也見淮南
子天文訓司馬遷律書班固律歷志其後之祖述者
不待言矣淮南子曰黃鐘之律九寸而宮音調因而

九之九九八十一故黃鐘之數立焉是宮數之八十
一固由律之九寸而出也所以必九其九者以宮數
為八十一而後商角徵羽各得整分無奇零也載堦
舍其九寸之說而執宮數之八十一以為縱黍之長
此其為臆說者一也律書生鐘分曰子一分丑三分
二十二律子母之分甚明載堦強以子一分為一尺
又引漢志算法用竹徑一分象黃鐘之一為一尺之
明證夫漢志所云算法用竹者即後世之算籌也徑

一分長六寸其數也徑象黃鐘之一而長象林鐘之
長乃因數而行其義也象黃鐘之一者即黃鐘之一
分象林鐘之長者即林鐘之長數也如以黃鐘子一
分為一尺則林鐘丑三分二已非六寸顧以徑一分
象黃鐘之一者為一尺則長六寸象林鐘之長者又
何說耶此其為臆說者二也律書又曰置一而九三
之以為法實如法得長一寸凡得九寸命曰黃鐘之
宮漢志曰以成之數忖該之積如法為一寸則黃鐘

之長夫所謂成者酉也即置一而九三之之數也所謂該者亥也即置一而十一三之之數也其理其法信而有徵載堦乃概以劉歆班固為偽辭而謬指史遷之一分為橫黍一尺之柄據此其為臆說者三也呂氏春秋以三寸九分為含少乃黃鐘之少宮載堦執黃鐘為八寸一分遂以一百二十為律呂之全數謂於一百二十之中減三十九得八十一夫一百二十數既不合於圖書而說又不見於經傳是何從而

出者耶此其為臆說者四也管子曰凡將起五音凡
首先主一而三之四開以合九九以是生黃鐘小素
之首三之而四開云者乃三倍全分之數四分之而
取其一之謂是指絃音宮分為下徵四分之三而言
詳見上編載堦乃以三之為三寸又四之為十二寸開以
合九九為黃鐘之長八十一夫四與開既不得拆為
二義十二寸又不得指為一百二十是強為之解而
其義益不可通也此其為臆說者五也秦火以前古

制雖不可考然易數在所未焚而漢儒言律實倚易數而起稽古者斷自漢儒始矣載堦概舍先儒而不之信任其私智創為新法乃曰蓋黃帝云然此其為臆說者六也律呂之用三分損益也取諸聲而後驗諸數漢志所為制十二管以聽鳳凰之鳴雄鳴為六雌鳴亦六比黃鐘之宮而皆可以生之蔡邕所謂古人制律以耳齊其聲後人不能則假數以正其度是也載堦亦謂律由聲制非由度出而乃自立差分之

法使第十三率為第一率之半則是律由度出而非由聲制矣此其為臆說者七也律呂之隔八相生也亦由十二律之既定而推其損益之序適合乎位次之自然非人之所能為也載堦既以已意立為差分之法則連類而生也可隔一亦可隔二亦可以至隔三隔四隔五隔六隔七順生逆生亦無不可是則人之所為矣乃以此為循環無端之妙用其何堪識者之一噓耶此其為臆說者八也律呂之圍徑皆同

也圍徑同而長短異故聲之清濁高下於是乎生漢志所謂厚竅均者是也如以意為遞減則正律之於倍律半律之於正律或命為斜之方或命為周之徑或命為三角之中垂自二之一以至百之一極形變態無所不可而究於律呂之清濁高下無當也此其為臆說者九也且律之為數長九寸空圍九分積八百一十分合縱長面累積實計之無往非九而聲適中黃鐘之宮三分損益終於十二此聲音理數之所

以妙合也載堦以黃鐘為一尺外徑五分而面冪積
實無一合者徒執差分周而復始之法以自鳴其算
術之精此術士之曲藝而於聲音數理毫無所取也
此其為臆說者十也曰然則載堦之言律誠臆說矣
顧其所定十二律之率皆以倍應鐘之率累除而得
之正律恰為倍律之半終而復始可不謂精於算乎
曰所貴乎算術者皆出於數理之自然故黃鐘為律
本而十一律皆由之而生至順也如以倍應鐘之率

累除而得之不已逆乎曰載堦之密率出於臬氏為
量內方尺而圓其外句股求弦豈絕無義理歟曰非
有義理也特假借句股之名以欺人耳夫以黃鐘為
度法東西為句南北為股倍蕤賓為弦其名已無當
矣至以句乘蕤賓開平方而得南呂以句股乘南呂
開立方而得應鐘又將何以名之乎且其自為之說
曰造率始於黃鐘必先求蕤賓者猶冬夏二至次求
夾鐘南呂猶春秋二分然其率並無次求夾鐘之法

則是惟務文飾其詞而並不顧其顯謬也又寧可以義理求耶曰然則其率果何法乎曰差分法也亦開諸乘方法也其術先定黃鐘正律為一尺倍黃鐘為二尺其間十一律皆欲作為連比例率使累次乘除而得之故以倍應鐘之率除倍應鐘得黃鐘之一尺即以倍應鐘之率除倍無射得倍應鐘是則倍應鐘之率為方根而倍無射之率即方根自乘之數也倍南呂之率即方根再乘之數也由是遞推至於倍黃

鐘之率即方根十一乘之數也夫十一乘方之積其為自乘者二再乘者一故以倍黃鐘之率為實開平方得數又開平方得數又開立方即得倍應鐘之率也其所以一開平方而得倍蕤賓再開平方而得倍南呂者凡數以某數乘幾次之數相乘即與以某數乘幾次等試以黃鐘為一分逆歷亥戌酉申未午得倍蕤賓為第六乘若以倍蕤賓為一分逆歷巳辰卯寅丑子得倍黃鐘亦為第六乘故倍黃鐘為倍蕤賓

之自乘開平方即得倍蕤賓也又以黃鐘為一分逆
歷亥戌酉得倍南呂為第三乘若以倍南呂為一分
逆歷申未午得倍蕤賓亦為第三乘故倍蕤賓為倍
南呂之自乘開平方即得倍南呂也如以倍黃鐘之
率為實先開立方則得倍夷則之率次開平方則得
倍無射之率再開平方亦得倍應鐘之率或以倍黃
鐘之率為實先開平方得倍蕤賓之率次開立方亦
得倍無射之率是則開諸乘方之法固然

法見數
理精蘊與

句股弦冬夏至春秋分諸名義了無干涉而乃飾其詞以自文假其名以欺世不亦惑之甚耶曰差分開方之法誠足以破愚而解惑矣顧竊聞開方之說方邊以十寸為尺平方以百寸為尺立方以千寸為尺故載堦以二百寸為實開平方得倍蕤賓以十寸乘之開平方得倍南呂又以十寸再乘開立方始得倍應鐘今謂以倍黃鐘之率二尺為實或開平方或開立方則寸分以下位數之不齊其將何以命之乎曰

善哉問凡命位以單位為主彼其黃鐘之率為一尺
倍黃鐘之率為二尺其十一律之率皆在一尺二尺
之間雖累次乘除其位不改故第以尺為單位而寸
分以下之奇零皆由尺次第命之自不虞其紊也此
命位之精義固非載堦所及知也曰三分損益止於
一法載堦不拘隔八則相生乃有四法可不謂善變
者乎曰非善變也止一比例術耳且使十二律果可
以比例相求則又變之不勝變豈止四法已哉如載

堦第一法黃鐘生林鐘林鐘生太簇下生五億乘上
生十億乘皆以七億四千九百一十五萬有奇除之
是固近似乎三分損益者矣而其實有不然者彼以
黃鐘生林鐘林鐘生太簇猶仲呂之再生黃鐘故其
所為七億四千九百一十五萬有奇者即其仲呂之
率也下生猶正生半故以五億乘上生猶半生正故
以十億乘則猶是比例術也第二法黃鐘逆生仲呂
仲呂逆生無射下生五億乘上生十億乘皆以六億

六千七百四十一萬有奇除之是又大異乎三分損益者矣而亦有不然者彼以黃鐘逆生仲呂仲呂逆生無射猶林鐘之逆生黃鐘故其所為六億六千七百四十一萬有奇者即其林鐘之率也上生下生同第一法則亦猶是比例術也第三法黃鐘生大呂大呂生太簇均以五億乘以五億二千九百七十三萬有奇除之則是以應鐘生半黃鐘為比例也第四法半黃鐘生應鐘應鐘生無射均以十億乘以九億四

千三百八十七萬有奇除之則是以大呂生黃鐘為
比例也夫十二律既皆為連比例率則順逆錯綜無
所不可與其以仲呂再生黃鐘為比例何如以黃鐘
下生林鐘為比例與其以林鐘逆生黃鐘為比例何
如以黃鐘轉生倍仲呂為比例與其以應鐘順生半
黃鐘大呂逆生黃鐘為比例何如以黃鐘順生大呂
逆生倍應鐘為比例變除用乘法良簡易載堦何未
之知耶曰然則載堦之不用三分損益不拘隔八相

生固皆出於私意而不足道矣顧其所定圖徑之數
十二律雖不同然半黃鐘適為倍黃鐘之一半亦以
定率累除而得之是又用何術與曰二十三乘連比
例率也彼求十二律之長以正黃鐘為倍黃鐘之半
中間十一律故為十一乘連比例率其求圖徑則以
半黃鐘為倍黃鐘之一半中間二十三律故為二十
三乘連比例率夫二十三乘方之積其為自乘者三
再乘者一較之十一乘方之積又多一自乘而倍半

之比例等故即以倍應鐘之率為實開平方即得求
圖徑之比例率也曰然則其求圖徑之率固亦比例
法矣但其黃鐘之外徑適為內徑方之斜又與倍黃
鐘之內徑等此亦豈私意之所得為歟曰此其比例
之巧合者也蓋以半黃鐘之率為一分則黃鐘之率
為第十二乘若以黃鐘為一分則倍黃鐘之率亦為
第十二乘故倍黃鐘之率與黃鐘自乘之數等以倍
黃鐘之率二尺為實開平方得一四一四二一三五

為黃鐘之率而兩率相為比即同於斜與方之比其數恰合非有出於比例之外也曰圓徑之數固出於巧合矣但巧合於此者必不能合於彼載堦以比例率求圓徑又以比例率求面冪積實何以皆盡合乎曰此同一比例也凡物以類相比邊以線面以自乘體以再乘線面體雖不同而比例則一載堦求面冪之率即求長之率也亦即徑率自乘之數也求積實之率即長率再乘冪率之數也夫以其徑率自乘而

求面冪又以其長率再乘而求積實初無彼此之別
又安得不盡合耶曰載堦所定縱長面冪積實之率
固同一比例而不足道矣若其求周徑面冪之法不
視古為密歟曰古術求圓大抵以周三徑一為率祖
沖之始立密術徑七周二十二方積十四圓積十一
載堦又自立密率容方九周四十方積自乘一百六
十二圓積自乘一百雖比祖沖之約率稍密而小數
亦有微差且沖之之術簡易載堦之術繁難工拙不

敵故亦不足取耳曰載堦引淮南子及晉宋書所載
十二律呂之數謂亦不用三分損益與其新法頗同
其說然歟曰不然是載堦之臆斷也按淮南子晉書
蕤賓之數五十七宋書作五十六夷則之數五十一
宋書作五十當以淮南晉書為是而宋書為非應鐘
之數四十二宋書作四十三夾鐘之數六十八宋書
作六十七當以淮南晉書為非而宋書為是蓋即三
分損益之數過半分者進一數不足則棄之猶算家

之所謂強弱也載堦自執己見以來鐘之數為六十
八則與其所謂上生一千乘下生五百乘總以七百
四十九除者相合遂以淮南晉書為斷夫所謂七百
四十九者即其仲呂之率而去其奇零耳不可以為
據也故曰此載堦之臆斷也曰七百四十九固載堦
之臆斷矣敢問其所謂別法用一千乘五百乘而用
七五除者又何說耶曰即三分損益之法也以七百
五十為三分則二百五十為一分故一千為四分即

三分益一也五百為二分即三分損一也載墁以三分損益為舊法而又必以一千乘五百乘七百五十除者為別法則其好為新奇可知矣

律數往而不返

問律呂之數往而不返何也曰據蔡氏律呂新書九
分為寸仲呂之長六寸五分八釐三毫四絲六忽三
分益一再生黃鐘得長八寸七分八釐一毫六絲二
忽比之黃鐘九寸不足一分零七毫二絲七忽故朱
子曰自黃鐘至仲呂相生之道窮矣遂復變而上生
黃鐘之宮再生之黃鐘不及九寸只八寸有餘是也
此蔡氏之舊說也以今法十分為寸古尺之數推之

仲呂之長六寸六分五釐九毫一絲四忽七微四纖
有奇三分益一以上生得長八寸八分七釐八毫八
絲六忽三微三纖有奇比之黃鐘九寸不足一分二
釐一毫一絲三忽六微六纖有奇以今法今尺之數
推之仲呂之長五寸三分九釐三毫九絲零九微四
纖有奇三分益一以上生得七寸一分九釐一毫八
絲七忽九微二纖有奇比之黃鐘七寸二分九釐之
數不足九釐八毫一絲二忽零七纖有奇亦仍蔡氏

之所謂不返也曰蔡氏之說如此不知淮南子司馬
遷京房及漢唐註疏之說同乎曰同也淮南子以黃
鐘之數為八十一仲呂之數為六十司馬遷律書以
黃鐘之長為八寸一分仲呂長五寸九分三分二強
後漢志京房律準黃鐘九寸自分以下用小分仲呂
長六寸六分小分六弱周禮註疏黃鐘九寸自分以
下用約分仲呂長六寸一萬九千六百八十三分寸
之一萬二千九百七十四皆以三分益一而上生之

其長皆不及黃鐘之數是其為往而不返則一也曰
其所以往而不返者何也曰易有之窮則變變則通
天下未有窮而不變者即未有不窮而能變者律至
仲呂而窮即以不返而變變而後十二律之道通也
夫同律度量衡之道興協時月正日同十二律猶十
二時也十二月也歷十二時而成日而亥盡交子之
時非即昨日之子歷十二月而成歲而正月朔旦非
即立春積歲而為章積章而為會積會而為統即至

十一月朔旦子時冬至五星如連珠日月如合璧而其所會之度必不同於太初之度其義一也今欲仲呂生黃鐘是猶歲歲必以元日立春也烏乎可哉然仲呂三分益一雖不足黃鐘九寸之數而較之大呂已為有餘寧得不謂之返於黃鐘耶猶夫癸亥歲十二月既盡甲子元日雖非立春寧得不謂之返於甲子耶曰明朱載堉獨不從此說何也曰朱氏以算術取巧必欲其返而十二律之本數皆舛是猶回回以

春分為歲首十二月為一歲而每月不必定三十日
則有氣而無朔矣天竺以黑月白月紀時一歲二十
四月以哉生魄哉生明為月朔不必置閏則有朔而
無氣矣是二法者皆可舍氣盈朔虛而氣盈朔虛在
其內然此可以為敬授人時之憲典歟

律數合於易

問律呂之數於易數亦有合乎曰律數即易數也太陽之數九太陰之數六少陽之數七少陰之數八故易陽用九而不用七陰用六而不用八律呂則兼之矣曰律呂之損益相生止用參兩而已未嘗用九六也曰是何知其一而不知其二耶班史之志歷也曰黃鐘初九律之首陽之變也因而六之以九為法得林鐘初六呂之首陰之變也皆參天兩地之法也上

生六而倍之下生六而損之皆以九為法九六陰陽
夫婦子母之道也由是言之則參兩即九六也黃鐘
生林鐘六九五十四九為法得六寸是下生六而損
之也林鐘生太簇六六三十六倍之得七十二九為
法得八寸是上生六而倍之也十二律上下相生皆
是法也曰律數之用九六既聞命矣敢問用八何居
曰律之用八即上生六而倍之也林鐘六寸太簇八
寸是六生八也即三分益一也亦即四其實而三其

法也曰然則九六八即三統之義乎曰然而不盡是也黃鐘生林鐘九生六也太簇生南呂亦九生六也由是推之凡三分損一以下生者皆是數也林鐘生太簇六生八也南呂生姑洗亦六生八也由是推之凡三分益一以上生者皆是數也又從而析之陽律陰呂分類左旋太簇得黃鐘九之八姑洗得太簇亦九之八南呂得林鐘九之八應鐘得南呂亦九之八由是推之凡一下生一上生者皆是數也寧止三統

而已哉曰九六八既聞命矣敢問用七何居曰律呂之數無往而非七也宮生徵徵生商商生羽羽生角角生變宮變宮生變徵律雖十二而每調所用惟七聲此左傳所謂七音國語所謂七律也漢志引虞書之文以在治忽為七始詠說者以為七始即七聲也然則樂聲之用七自簫韶而已然矣後周武帝時龜茲人蘇祇婆善胡琵琶聽其所奏一均之中間有七聲然則樂聲之用七實出於天籟之自然不獨中土

為然矣是故以聲音之高下言之則第八音與首音
同其間之相距不過七等以相生之位分言之則八
八為伍其間之相距不過七位以相生之次第言之
自黃鐘至大呂復為清宮其間之相距不過七次此
七之為數所以行乎九六八之中而為律呂之大用
也曰九六八皆為律呂之體數七之所以為用數而
不得為體數者何也曰體亦有之變宮之數四十二
七六之數也變徵之數五十六七八之數也而其所

以為用者則又有說一二三四生數也九八七六成數也是故太陽居一而含九少陰居二而含八少陽居三而含七太陰居四而含六律呂之數不起於生數之一二四故得以其所含之數為體若生數之三則律呂之數所自起既起於其生數之三故以其所含之數為用亦猶八卦用九用六而揲著則獨用七七四十九也故曰律數即易數也

中聲

問宮最濁商次濁角居中徵次清羽最清然則角乃中聲樂不以角為君而以宮為君何也曰朱子論之詳矣然朱子知宮為聲之中宮前有羽而角非中是已而猶循漢唐之謬謂當續以半黃鐘半太簇半大呂半夾鐘四清聲於十二律之後則猶未免於崇古信古之太甚也沈括曰濁為宮稍清為商最清為角清濁不常為徵羽斯言最是然而未嘗明其所以然

則或其心解而神會歟抑或獨得秘書傳其舊聞以
待後之學者而亦未知其義歟皆不可知也夫音大
則濁小則清自宮以下清至於羽而止自羽以上濁
至於宮而止然管子言五聲數徵羽大於宮然則宮
之上有徵羽猶夫角之下有徵羽也羽之下不容復
有聲必轉而之乎宮之上乃可是以沈括曰徵羽清
濁不常夫徵羽必轉而之乎宮之上乃可然則宮乃
中聲正聲君聲而不可以紊歟若加半聲於羽之下

則角固中聲正聲君聲矣朱子何以又曰角雖當五聲之中而非衆聲之會也然則沈括斯言正足以証律呂應倍不應半之義也

四倍律

問古以十二正律不足於用必加以四清聲而後成樂此晉唐以來至於朱子蔡季通未之有改者也明代朱載堉輩本朝毛奇齡輩論樂雖淳龐錯出要於四清聲之說罔或異同焉今乃不用半黃鐘半太簇半大呂半夾鐘而用倍夷則倍無射倍南呂倍應鐘如謂十二律伶倫制之不應復加四半聲則加四倍聲於黃鐘大呂之上無異於加四半聲於無射應鐘

之下也如使可加則何不仍其舊制而必務其異於古歟況黃鐘為元首之象與其加倍律於上何如加半律於下歟曰黃鐘者應乎氣之始而實應乎聲之中中則必有始今不始之求而於末續之以中為始則中失其中而黃鐘於是乎非黃鐘而以太簇夾鐘姑洗之間當黃鐘矣蓋歷漢唐宋元明而無人為破其惑也夫言大樂者必曰元聲正聲中聲黃鐘之聲中之中也中之中即正中也故曰正聲從此正中之

聲以執其兩端而數乃由以起則此正中之聲乃元聲也然而此聲必有上必有下上之固至於無射應鐘矣下之非加四倍律則黃鐘不得為中之中四倍律者乃自然而然而毫非人力之所能為也若夫天地之性必至於中之中而後能生生而不窮冬至子之半天心無改移中之中也一陽初動處萬物未生時則謂之始也固宜故自律之通於數者言之則黃鐘固始也固元首也不特星官家舍冬至無以推步

即音律家不得黃鐘之真度又何以推知四倍律之真度若其考擊之間則音必更唱迭和如輪轉虛然後可以為樂則黃鐘為宮固必處乎中之中也即至應鐘為宮亦未嘗越此正中之聲之度也然欲令黃鐘之聲處乎中之中非加四倍律其曷由乎古人深知律之即歷往往舉歷以明律舉律以明歷後世不達泥其辭而失其意信乎目而不求諸耳乃以黃鐘為始律故第一聲必黃鐘於是宮立於姑洗焉又舛

其度於是或在太簇夾鐘之間或在夾鐘姑洗之間
是以不用半聲不能成樂此數千年之襲謬至

聖祖仁皇帝而重開者也朱子亦曰黃鐘為中之中猶夫
子時初四刻屬前日正四刻屬後日兩日之間中之
中也正與今之用倍律不用半律者同義而特未嘗
著為定論以黜用四清聲之非則以未嘗指得黃鐘
之真度而不敢輕議漢唐諸儒也假使朱子而在今
日得左右

聖祖仁皇帝以成一代定樂之功不且千古之一快也哉

七律

問國語載周景王問伶州鳩以七律而韋昭以宮商角徵羽變宮變徵釋之其說相沿已久今乃謂此為七音非七律請問七音之說何自昉乎曰七音之說周以前不見於經傳至左傳昭公二十年齊晏子對景公始有七音之說晉杜預注云周武王伐紂自午及子凡七日王因此以數合之以聲昭之故以七同其數以律和其聲謂之七音七音宮商角徵羽變宮

變徵也杜佑通典曰自殷以前但有五音周加文武
二聲謂之七音五聲為正二聲為變鄭樵通志說亦
同此七音所由來也曰若然則杜預固亦以七音為
七律矣韋昭之訓安見其為非耶且淮南子天文訓
曰黃鐘為宮太簇為商姑洗為角林鐘為徵南呂為
羽應鐘為變宮蕤賓為變徵賈逵注周語云周有七
音謂七律七器音也自黃鐘為宮至蕤賓為變徵為
七音賈逵之注如此而韋昭承之何謬之有曰十二

律有定管而七音無定位隨律起音而皆可命以七音之目以音從律而不可專隸乎何律之名所謂還相為宮也今專泥黃鐘為宮將大呂以下十一律遂不可為宮乎泥太簇為商將夾鐘以下諸律遂不復為商乎推之角徵羽及二變皆然可知分某律為某音者之膠而不可通也曰然則古之人皆非耶曰淮南子之言是指黃鐘一均以例其餘律舉一隅也杜預之言謂由七日有七律由七律有七音末乃著其

七音之目也若賈逵韋昭等謂自黃鐘為宮至蕤賓為變徵謂之七律或其意亦主自午至子七日之義言之然其文未明頗似唯此七律有七音又似舉音與律而混之故不可以不辨也曰然則七律之說奈何曰國語伶州鳩所對七律具焉何舍是而別求為哉伶州鳩曰武王伐殷自鵠及駟七列也南北之揆七同也凡神人以數合之以聲昭之數合聲和然後可同也故以七同其數而以律和其聲於是乎有七

律此七律之因也又曰王以二月癸亥夜陳未畢而雨以夷則之上宮畢之當辰辰在戌上故長夷則之上宮名之曰羽所以藩屏民則也王以黃鐘之下宮布戎於牧之野故謂之厲所以厲六師也太簇之下宮布令於商昭顯文德底紂之多罪故謂之宣所以宣三王之德也反及羸內以無射之上宮布憲施舍於百姓故謂之羸亂所以優柔容民也此又七律之實也韋昭胡不於夷則之上宮黃鐘之下宮太簇

之下宮無射之上宮求之乎問者曰夷則黃鐘太簇
無射止四律耳今即以此為七律其詳可得聞乎曰
以此明七律者多矣惟明瞿九思及楊雲鶴二家之
言為得之合下宮上宮通計之而得七律之數者瞿
九思之說是也從辰定律而各得七律之數者楊雲
鶴之說是也瞿九思之說曰黃大太夾姑仲蕤林夷
南無應此十二律之序也凡起調必始於宮夷則之
上宮曰羽乃夷則居上為宮而南無應黃以次遞而

順下焉黃鐘之下宮曰厲乃黃鐘居下為宮而應無
南夷以次遞而逆上焉太簇之下宮曰宣乃太簇居
下為宮而大黃應無以次遞而逆上焉無射之上宮
曰羸亂乃無射居上為宮而應黃大太以次遞而順
下焉合四調而計之所用者乃夷則南呂無射應鐘
黃鐘大呂太簇七律焉此七律所由名也其夷則之
上宮即黃鐘之下宮太簇之下宮即無射之上宮而
必異其名曰羽曰厲曰宣曰羸亂云者即易卦上下

反對之義蓋其調雖異其律則未嘗不同也如否泰之名雖異而乾坤之卦則未嘗不同也此合下宮上宮通計之而得七律之數者也楊雲鶴之言曰伶州鳩之對皆辰與律相兼之義也蓋武王伐殷多用衝辰故年為午年渡孟津為午日牧野日為子日子午衝得七自辰至戌歷七支辰戌衝得七夷則申太簇寅寅申衝亦得七然則律因辰而得七也夷則上宮畢陳謂所用之律以夷則申宮起調上而用林蕤仲

姑夾太乃自申至寅之七律也日當辰辰在戌上謂
畢陳之時至戌而畢與辰相為敵也長夷則之上宮
名之曰羽夷則商律未至羽而取義於羽故曰長也
以黃鐘之下宮布戎於牧之野故謂之厲書曰甲子
昧爽戰於牧野黃鐘屬子以黃鐘子宮起調下而用
大太夾姑仲蕤乃自子至午之七律也太簇之下
宮布令於商昭文德而底紂罪故謂之宣當是以丙
寅日而宣布之以太簇寅宮起調下而用夾姑仲蕤

林夷乃自寅至申之七律也反及羸內以無射之上
宮布憲施舍於百姓故謂之羸亂武之終也當是以
戌日布施或即書曰越三日庚戌柴望大告武成因
而布憲施舍乎以無射戌宮起調上而用南夷林蕤
仲姑乃自戌至辰之七律也此謂律從辰得而各有
七律之數者也以二說較之則雲鶴之說更優蓋以
州鳩所云自鶉及駟為七列南北之揆為七同之說
推之而知律從辰起之義為更親且確也所不足者

獨於兵家吹律聽聲之道則皆未有聞焉耳周禮太師掌同律以聽軍聲太公亦云以夜半聽五聲符五行卜三軍勝敗師曠嘗歌風而識南北之競否司馬遷亦云望敵知吉凶聞聲効勝負此兵法也故武王當至商郊吹律以聽軍聲而其聲之所中節次有如此者當其夜陳未畢時聲中夷則之上宮而得林蕤仲姑夾太七律焉既而聲中黃鐘下宮得太夾姑仲蕤七律而牧野於以布戎既而聲中太簇下宮得

夾姑仲蕤林夷七律迺布令於商以底其多罪焉反及羸內聲中無射上宮而得南夷林蕤仲姑七律乃布憲施舍於百姓焉此皆吹律以聽軍聲而得其聲之所中也其止於七者則傳所謂七列七同之數而雲鶴所謂當申寅子午寅申辰戌之衝者也辰之位至七而沖音之位至七而畢此天地之自然而非人力所能為也然則七律者出於吹律而聽之之聲固不得取七音以實之也曰武王以自午及子七日而

有七律因七律而有七音杜佑輩又以古來惟有五音周始加文武二音而為七設使武王伐紂成功以八日或九日則將為八律九律乎且所為文武二音者其義何居曰音之有七也非聖人所能強為也伶州鳩之意蓋謂唯此七律與周家受命之符有冥合者故曰南北之揆七同也言此七律能與周德相同也非謂自鷄及駟凡七列故用七律若自鷄及心凡八列便可用八律也夫第八律必與第一律同音故

數止於七無八也若夫文武二音之說尤屬附會蓋
舜作五絃之琴自虞迄殷而文王乃益之為七絃其
二絃謂即今下徵下羽名文武二絃杜預因七同之
說而名二變為文武二音謂自周始有之良弗深考
也夫七音與天地同始周以前不得無而七音仍止
五音五音與天地同終周以後不得加也夫琴絃者
物也物可受名名以文武猶可若音聲曷可被以文
武之名哉天道一陰一陽盡之矣治道一文一武盡

之矣今名二變以文武則將以何者為五正之嘉名
哉曰音數止七而無八則八音曷稱焉曰八音八物
之音也一物之音各具七縱言之則得八橫言之則
得七卦之數八而著之數七行於八之中天地之
至理也

變律

問漢志京房六十律蔡元定律呂新書六變律今皆不用何也曰律之不得有六十上編既言之矣

見黃鐘轉

生律呂篇

夫聖人制律必實有是音而後有是器六呂之

與六律同一聲字而高半音故謂之六同又謂之六間若執始而下比之正律只差分釐愈短則差愈少不能自成一音又安得自為一器乎新書用六變律變黃鐘即執始變林鐘即去減變太簇即時息變南

呂即結躬變姑洗即變虞變應鐘即遲內不用其名
而用其實謂為還宮用聲之綱領今絃則取之而管
則不取絃之取之者以仲呂之度為宮則其五聲二
變之音必為變律之分其分即在本絃管之不取者
以仲呂之管為宮則其五聲二變之音已具八管之
內六正呂
二倍呂不須另製變律也曰絃之有取於變律既
聞命矣新書有云樂之和在於三分損益樂之辨在
於上下相生今以仲呂之管為宮其餘七管皆非仲

呂上下損益之所生宜其不和不辨而謂五聲二變之音已具八管之內又何也曰十一律皆由黃鐘上下損益而生則是十二律之音固已和矣辨矣安得仲呂為宮遂不和不辨乎且由仲呂而再生六變律不能與六正律另為一音安得與變律和而辨與正律不和不辨乎和且辨矣故仲呂為宮林鐘為商南呂為角應鐘為變徵倍應鐘為徵大呂為羽夾鐘為變宮無庸更求變律而七聲之用自足故曰已具

也曰沈括以五十四在黃鐘為徵在夾鐘為角在仲呂為商新書以為誤何也曰彼以律呂相生而言即今之絃度也絃度五聲之分皆由宮分三分損益而生故八十一為宮七十二為商六十四為角五十四為徵四十八為羽乃黃鐘一均之數以下十一辰辰各有五聲其法亦如之故夾鐘六十七分四二有奇為宮則其角分當得五十三分二七有奇仲呂五十九分九三有奇為宮則其商分亦當得五十三分二

七有奇夫五十三分二七有奇者乃變林鐘之度與
五十四之數不合故新書以沈括為誤若夾鐘之管
為宮則仲呂為商而林鐘為角仲呂之管為宮則林
鐘為商亦何誤之有哉曰絃音以仲呂之度為宮則
變林鐘之度為商變南呂之度為角變應鐘之度為
變徵半變黃鐘為徵半變太簇為羽半變姑洗為變
宮是以臣民事物不相侵犯今管不惟無變律而並
無半律縱正與變無甚分別而全與半則大相懸殊

又安得不相陵犯乎曰管無半律而有倍律倍無射
與半黃鐘應則用倍無射猶之用半黃鐘也倍應鐘
與半大呂應則用倍應鐘猶之用半大呂也且夫窮
上者必反下與其用半律而高無所止何若用倍律
之轉而不窮與其用半律而促不可聽何若用倍律
之舒而可久子無疑於半律何獨疑於倍律耶曰律
之用倍義深遠矣獨是何以無陵犯之嫌耶曰有倍
律在也如無射為宮則倍無射為商而黃鐘為角正

倍同名既無彼此之嫌自倍而正又皆自然之序故
倍律者成終成始之道也曰名之無嫌固已獨疑其
聲耳國語曰大不踰宮細不過羽宮音之主也第以
及羽所謂不相陵犯也今管無半律則商角徵羽不
嫌其大於宮乎曰否非是之謂也國語所云者乃五
音之定分宮數不及八十一則為君陵臣商數大於
七十二則為臣犯君五音各得其分而不失之少則
不下陵矣各得其分而不失之多則不上犯矣不陵

不犯則各得其序矣至於還宮之法則或倍或半各隨其用管子徵羽之數大於宮是也蓋調有高低音有升降高調自下而上上極則轉而之低低調自上而下下極則轉而之高中調則周旋於高低之間乃聲音自然之理橫笛洞簫皆六孔各孔皆可為宮不慮他孔之大於宮也且今管音還宮之法亦綦如環無端矣無射為宮倍無射為商倍無射雖大於無射而實比無射高一音黃鐘比倍無射又高一音自有

倍無射而黃鐘以下止覺其高不覺其低也又烏有
大於宮之患哉曰還宮之義誠善矣但黃鐘不為他
律役者以有變黃鐘也今無變律則黃鐘為他律役
矣其可乎曰黃鐘之不為他律役乃絃度之自然後
人因以至尊之義傳之耳鐘律止於十六若非黃鐘
將焉用之且即以役而論林鐘止為黃鐘役太簇不
為姑洗南呂役南呂不為姑洗役臣為君事役而不
為民物役猶可說也事不為臣役物不為民役亦有

說乎夫六律六呂猶乾坤六爻也變動不居周流六

虛所以成變化之道也故以聲氣之元而論則十一
律皆黃鐘統體一太極也而以還相為宮而論則黃
鐘亦一律各具一太極也使能大而不能小能尊而
不能卑則黃鐘轉成無用之物而於義為亢矣況律
以和聲倡和清濁迭相為經所以成樂也而拘文牽
義宣律呂之本哉曰新書八十四聲圖無射為宮變
黃鐘為商何也曰彼乃絃度也以無射之分為八十

一則變黃鐘之分為七十二七十二者商也非變黃鐘也猶以應鐘之分為八十一則半大呂之分為七十二七十二者商也非半大呂也問者躍然喜曰律呂正變倍半之義誠至今日而始明第不知古人何以皆未之及也曰古亦有之特未詳耳周禮鳧氏為鐘賈公彥疏曰以律計自倍半杜佑通典曰以子聲比正聲則正聲為倍以正聲比子聲則子聲為半正聲十二子聲十二為二十四鐘上編乃斷之曰倍律


對正聲言真倍律也倍仲呂而上聲抑而啞半蕤賓而下聲噍而促惟蕤賓以下六倍律仲呂以上六半律可以相和應聲此為定論今樂用四倍律十二正律則又取其中和純粹者也曰然則明鄭世子載堦六變律可廢之說與今同乎曰否鄭世子謂仲呂復生黃鐘而半律與全律應故七音皆用正律失還宮之實而蹈商大於宮之弊則又不如用變律之猶自有條理也烏可與今之精義而利用者同日語哉

欽定四庫全書

御製律呂正義後編



御製律呂正義後編卷一百十八



總校官庶吉士臣張能照

校對官中書臣馮培

謄錄監生臣丁湘錦